

Tumpu agenda bangun ekonomi negara - Raja Nazrin



Raja Nazrin Sultan Azlan Shah (duduk tengah), Tuanku Zara Salim (duduk empat dari kanan) dan Anifah Aman (duduk, tiga dari kiri) bersama bakal Ketua-Ketua Perwakilan Malaysia di Kuala Lumpur, semalam. -BERNAMA

KUALA LUMPUR 31 Jan. - Raja Muda Perak, Raja Dr. Nazrin Shah Ibni Sultan Azlan Shah bertitah, hubungan diplomatik antara Malaysia dengan negara luar perlu memberi tumpuan kepada agenda membangunkan ekonomi negara.

Baginda bertitah, usaha itu boleh dilakukan ekoran pembangunan ekonomi di setiap negara di seluruh dunia pada masa ini secara umumnya menunjukkan peningkatan.

Titah baginda, malah peningkatan ekonomi di sebahagian daripada negara terbabit lebih makmur.

"Oleh itu perkembangan yang berlaku ini perlu dimanfaatkan sepenuhnya dalam konteks hubungan diplomasi antara Malaysia dengan negara-negara luar terutama dalam bidang tersebut.

"Sebagai contoh China dan India adalah dua negara kuasa ekonomi baru, namun begitu dalam usaha kita mencari peluang-peluang ekonomi, prospek perlu diperluaskan," titah baginda.

Baginda bertitah demikian pada Majlis Santapan Malam bersama bakal Ketua-Ketua Perwakilan Malaysia di sini malam ini.

Turut hadir Raja Puan Besar Perak, Tuanku Zara Salim; Menteri Luar, Datuk Seri Anifah Aman dan Ketua Pengarah Institut Diplomasi dan Hubungan Luar, Datuk Ku Jaafar Ku Shaari.

Raja Nazrin bertitah, iaitu bukan sahaja di negara China dan India tetapi usaha yang sama juga perlu digerakkan di negara-negara yang mampu memberikan peluang ekonomi kepada negara.

Baginda dalam pada itu mengakui bahawa China dan India bakal menjadi kuasa ekonomi dunia dalam beberapa dekad akan datang.

Titah baginda, berdasarkan jangkaan, China bakal menjadi kuasa ekonomi terbesar dunia pada tahun 2030 manakala India akan menjadi kuasa ekonomi ketiga besar dunia pada tahun 2050.

"Amerika Syarikat sebagai kuasa besar sejak pertengahan abad yang lepas serta sebagai satu-satunya negara yang cukup berkuasa lebih dua dekad akan tergelincir daripada kedudukannya sekarang," titah baginda lagi.